

Ceu Pa Mhawm Ti Tawng Grawng Teei Carang Jung Pwi

Mai Lhang Nyiex Ka Daux Meung Man, 2014 Num



Cub Caw Pa Bung Kaing Krax Ot Pwi Mai Riang Rao Jung Pwi Meung  
Lum Dee Khrawm Num Ting Piang Haktiex (Lum Kam Pha)

Cub Caw Pa Kraix Khrawm Mau Son Jung Pwi Mai Pa Joh Jhan Kaing  
Khix Kao Tix 2013 Num







## Lox Jah

Can pwi haktiex khankix sawg ti tawng grawng carang pwi meung awm pa chawk cheng ti tawng ka kaing pa shiang mai an kix, mai kawn simie ti tawng sidawng ka kaing ceu pa yuh son an heue. Kheu hoik cheu ti yaox grawng carang pwi meung tix bawg mai kheu hoik kum ex grawng in tau mai cub caw pa yuh kaing ku cub caw, ex tom yuh lox chawk lox pawk son kaing in heue. Lox chawk lox pawk pa dawd mawh awm in plak greem tin heue.

### 1. Carang Pwi Meung Sang Ah Ka Pa Tix?

Carang pwi meung pa ah nan, mawh pa khrawm ti teei carang jung pwi ka daux meung tix bawg yam pa tat ti deuh tix bawg mai khrawm ti pon carang awm pa thawng rieang ka daux bawg yam tix ghiiep ngai heue. Ka daux kaing ceu an mawh koe jung pwi ka daux meung ot ex mie ding, jung pwi simex /sibon, baux ju jung pwi baux mawx baux an, krax ot kawn pwi, num jah pa yuh son pwi khankix tak sang pon ti khrawm heue. Can kaing ceu in khakix mawh pa ting ceu khawmuik heue. Carang pwi meung ka daux meung man an, tak sang jah ka daux 2014 num khix loe/khix pon heue. Bawg yam pa tat ti deuh son carang pwi meung an mawh daux 2014 num khix loe (29) ngaix plak pon sawm heue.

### 2. Mawh Pwi Mawx Pa Teei Beeh Glawm Son Carang Pwi Meung Lie?

Mawh cub caw pa ot greem pa bung grawng krax ot pwi mai cub caw ting pa khrawm riang rao jung pwi pa mawh cub caw pa bung riang rao jung pwi haktiex pa mawh cao pa teei beeh glawm mai teei carang pwi meung heue. Cub caw in mawh pa teei beeh glawm ti koh teei carang jung pwi mai tak kieh kaing teei carang khaw caw daux krax daux blawng mai kieh khaw caw mai bawg yam son sang deeh kieh pwi tawng kah heue.

### 3. Koh Ti Teei Carang Pwi Meung Kheu Pa Tix?

Son sang pon ti tawng carang jung pwi(phan) jung pwi dee kwang baux mawx baux an, mai grawng krax ot krax koe ka daux kaing can pa yuh an ex pon ti tawng kheu pa koh ti teei carang pwi meung heue. Khaix hoik tawng ka grawng ceu an khankix, vawng ang ah, pa ang mawh vawng cub pwi plak praix ang ah, tak sang pawd carang kaing pa sang yuh son bawg yam sivoie ngai sax ka piang grawng an khankix heue. Phan keut ti yaox ka carang pwi meung mai can kaing pa shiang mai an kix, pwi meung khankix caw ti khrex rien ti deuh son krax nyawm ot, son krax pingnya, son quang nyiex, son pa lai ling

tawx kraung khrai lah lai yuh ka mawx, chix pon ti tawng grawng pa lo koe yuh ka mawx heue. Mawh kheu nan daux 2014 num khix loe (30) ngaix kaing koh teei carang pa sang jah ti yuh hu an, kiiet lo ka pa rom ti yuh kaing teei carang pwi meung tau son ex daux meung man heue.

#### 4. Ka Daux Meung Man Hoik Koh Ti Teei Carang Pwi Meung Lai Mawx?

Ka daux meung man, koh ti teei carang pwi meung daux 1983 num heue. 1983 num, khaix hoik teei carang pwi meung khaix an (30) num daux 2014 num tak baox koh teei carang pwi meung tix bawg heue. Pa koh ti teei carang yam in, kiied ting ceu son meung man daux bawg yam pa sang hoek hu sivoe ngai heue.

#### 5. Khaw Ti Koh Carang Pwi Mie Bawg Tix Bawg?

Daux Meung ku meung koh carang jum pui (10) num tix bawg heu-e mawh kheu nan, daux meung man ex kawx, koh carang jum pwi awm bawg yam ku meng kix nawh, sang koh carang jum pwi (10) num tix bawg nawh heu-e.

#### 6. Daux num 2014, krax koh carang in, ex caw tix viex tau ku kaux mawh kheu cao pa tix?

Tak sang jhak ka carang pwi meung pa hoik teei in khankix mai sang shiao son pa tiem pa pawd grawng kaing sang yuh sivoe ngai heue. Phan pwi kukaux ang rom ti viex tau daux pa teei carang in, ang tau ti chix pon ka carang pwi meung, meung man tom khaw caw heue. Son sang tiem ka been pa hawt jawh ka son Meung Vawng, son pwi pa yuh krax haok huan, son can cub caw pa sawg ti tawng mai cub caw pa tang yuh kaing cie tix kankix, kiied sidaing lo tete heue. Mawh ngie carang pwi meung ngie khaing pa chix kieh grum naog chix kieh plaik laig ka daux kaing pa yuh ka daux meung man heue.

#### 7. Ex Kawx Sang Caw Ti Yuh Tau Ka Carang Pwi Meung In Lie?

Mawh heue,- ex caw ti rom yuh tau heue. Phan koh ti teei ka carang pwi meung tix bawg, caw ti teei carang pwi kukaux heue. Ang awm pa teei carang tang ceu, ang mawh pa teei carang pa simie ti teei ngie. Mawh pa teei carang pwi tom hoek ka daux eung daux yaong khankix, in mawh been hawt jawh son carang pwi meung heue. Son sang pawd tiem grawng kaing sang yuh, mai son sang pawd tiem grawng thawk theng dee ot krax hu tix, plak pingnya, mai pwi ang grum naog pakpeung, son sang koe krax pon kaing yuh tix, krax keh kawn, krax yum mai can beeh glawm an khankix mawh pa chix pon ti teei carang tom hu hoek daux nyiex yaong khankix heue. Mawh kheu nan ex tom so kaoh vaoh haing mai tawx lox son sang rom ti yuh tau ka kaing pa koh ti teei carang pwi meung pa mawh kaing ting pa sang yuh ex in mai rom ti koh carang in khankix heue.

**Pa Een Tawng** || Been hawt son carang pwi meung pa hoit tat Pyi Tux Lhut Daw ti tawx in, mawh pa sidiang ka pex heue. Awm pa koe daux been hawt jawh an yam





chawk cheng pwi teei carang ka pex, caw ti deeh pawk lox kix hawt been an heue. Been in mawh pa kham grawng son ceu pa tawx pex pa mawh pa ang kieh pwi tang kaux tawng kah heue. Pa koh ti teei carang pwi meung in, ang lai mawh pa sang kieh pwi pon ceu kaing son kaux mawx kaux an, mawh ngie son pa yuh carang khaing heue.

### 8. Pwi Pa hoek Daux Dieang Siviex Aux, Sang Pon Tawng Kix Mawh Pwi Hoek Teei Carang Pwi Meung Yuh Ka Mawx?

Tak sang pon tawng ka cao teei carang awm in plak greem heue.

- (1) Kix tak viex lai grawng mawh to kaux tix pwi teei carang
  - (2) Kix tak sang ceep kraung ceep pwi teei carang pwi meung
  - (3) Kix tak giex ti deeh lai lox chawk grawng carang pwi meung
  - (4) Kix tak giex riang hatiex pa situ mai ce (A3) tix mu
  - (5) Plak nie pex teu yax pwi ting daux dee ot pex rom ti hu mai cub pwi teei carang pwi meung.
- Pwi pa teei carang khankix tak mawh pwi ka daux dee ot pex pa mawh Sara/ cao gau khankix heue. Sivoe ang nyang teei carang pex tak sang jhi kieh tawng ka pex sivoe heue.

### 9. Mawh Sang Sawm Ka Pwi Mawx Laig Ka Daux Carang Pwi Meung?

Tak sang simin ka pwi pa koe daux 2014 num khix loe (29) ngaix plak pon bo khawmuik, pa koe daux meung man, ang laug ceu pwi kawn meung mawx, ang laug ceu pwi, ang laug ju, ang laug glawg, mawh pa sawm ka pwi khawmuik heue. Yam teei carang an, ang mawh teei ka pwi pa koe daux nyiex nong nong, mawh khawm pa koe daux nyiex sidah, nyiex nyo, nyiex cawng kawn doe, nyiex lien khankix, nyiex cawng vad an khankix heue. Kix pa koe daux bang khawm pwi tuk kha khankix kawx viex heue. Can pwi pa ang koe nyiex khankix tak teei ka carang kix khawuik heue.

### 10. Son Sang Rug Grawng Sau Pex Aux Laig Daux Carang Pwi Meung In Mawh Sang Yuh Pex Ka Mawh Lie?

Can pwi pa koe beeh glawm plak carang in, kix hoik pawd ti deeh rieang hatiex heue. Can nyiex yaong pa koe daux meung man khawmuik, dee koh ti teei dah mawx dee an hoik khrex rien ti deuh heue. Son sang pon rob kheem ka haktiex pa koe daux meung khawmuik sang shiao ka rieang haktix heue. Sivoe ang nyang koh ti teei carang pwi meung (3) ngaix, dha ti cied tawng ka lhang nyiex pa koe ka daux dee an heue. Mawh son sang tawng ex ka pwi pa koe lhang nyiex khawmuik, hoik viex daux carang pwi meung lie ang nyang vie lie ex sang pon ti tawng ka heue. Phan ang nyang hoek ti koh teei carang ka daux nyiex ma pex, tom haok khix pon (10) ngaix sitoe ti chawk ka cao giex kaing daux yaong pex heue. Phan ang mawh nan, chix sitoe krai ka baux veng dee ot tix ka maox rhiem awm pa hoit tawx ti deuh simin maox rhiem ka pex heue. Tak sang ploi pwi koh carang ti kaux hoek ka pex mai teei carang pex heue. Phan hoik teei carang nyiex pex, tak sang klieb ti deuh ce piang siviex nyiex pex grawng hoik teei ka carang pex heue.

### 11. Yam Teei Carang Pwi Meung Can Ceu Pa Tawx Ex Ti Deuh An, Ang Mawh Pa Shiao Son Krax Koh Keen, Ang Mawh Pa Chix Teei Pwi Koe Beeh Glawm Krax Grawng Pa Ah Nan Chix Pon Tawng Yuh Ka Mawx?

Been hawt jawh yam teei carang pwi meung pa hoik plih cub pyi tux lhut daw ti deuh an, hoik kham grawng pwi kaux mawx kaux an son sang ang kieh pwi tawng heue. Can carang pa hoik teei ti deuh uik, kix cub pa ting beeh glawm daux kaing teei carang an, kix sang priex rien mhawm awm pa koe daux been nawh heue. Viang cub caw pa khrex grawng riang rao pwi meung an kawx, kix sang teei beeh glawm grawng ang kieh pwi tawng mai kix hoik pawd mhai taix tix son grawng an heue. Awm hoik koe been hawt jawh daux carang pwi meung, ka pwi pa ang shiang mai grawng in ang ah, ka pwi yuh kaing vawng tix kaux kaux ang ah, ang pon ti mhaing teei ka lai in heue. Pwi vawng tang dah ang ah, yam teei carang pwi meung, ang pon ti mhaing jhak kah heue. Khaix hoik khrawm carang pa hoik teei an uik, mai khaix hoik khrex rien ex nawh, tak sang plih kieh pwi tawng heue. Pwi pa ang hawt daux been hawt jawh mai yuh krax lud daux been teei carang pwi meung, tak sang kieh nawh se mau (Phan ang mawh nan) kieh laig thawng (Phan ang mawh nan) kieh kham geu khawm ra ceu heue.

### 12. Lo Ti Tiiem Ceu Kaux Aux Tom Grum Naog Kheu Pa Tix?

Pa teei ex ka carang lhang nyiex khawmuik mai pa chawk ka ceu kaux mai pa klieb ti deuh lai grawng pa hoik koh ti teei carang pwi meung an mawh son sang pon cied ti tawng grawng an tom khaw caw heue. Son sang pon teei carang lhang nyiex khawmuik ka daux carang pwi meung an, mai mawh rug hoik pon teei ka carang pa keung ti teei lie/ ang pon teei lie, son sang kriem ex tom chawk cheng ceu kaux heue. Khaix hoik pon koh ti teei carang lhang nyiex maix tom grum naog, grawng to kaux maix (Lox tiag – Ceu kaux) tak sang kieh laig ka daux carang lhang nyiex heue.. Khaix hoik khrex rien ti deuh grawh grawng an grum naog khawmuik, tak sau daux cag dong heue. Cag pa thawng veei, ang chix phat ka ceu kaux dee ghoik khaix, glawg pa cox khrex ka carang an, grawng nyiex ma khankix, ang viex ceu kaux kawx, chix ti teei kieh mawh carang heue. Mawh kheu nan, tom ang lai pon deeh jhak ka lhang nyiex (Phan ang mawh nan) kaux mawx kaux an ka daux an heue.

### 13. Mawh Sang Tiiem Carang Pwi Meung Plak Lai Pa Tix Lie?

Hoik yuh ti deuh lox chawk carang pwi meung ka plak lox man heue. Son sang teei ceu kaux pwi tang meung, ex hoik yuh ti deuh plak lox kala heue. Pwi koh carang khankix mawh pwi pa chix sikah lox dee ot pex heue. Pa koe daux lai jhi tawng an ex tak sang tiiem thut lih plak lox cao pex, mawh kheu nan yam sang lang pex pwi mhong grawng pa ting ceu tibbleh, kieh mawh pa khaw caw awm an heue.

### 14. Son Sang Tiiem Lox Chawk Mawh Sang Rheung Bawg Yam Mie Glang?

Son sang tiiem lox chawk tak rheung been (25) minit heue. Khix loe (29) ngaix ex sang jhak ka piang jung pwi pa koe ka daux lai lhang nyiex maix, mai tak haok tak yawm awm pa lo heue.



### 15. To Kaux Cao Ex Sang Pon Tiiem Ka Lox Chawk Lie?

Ang pon- Son sang niied ti yuh phai phai, ex hoik tawx krax gau ka pwi pa teei carang khankix heue. Khaw ti mawh pwi pa hoik pheuk ka grawng an pa pon ti tiiem heue.

### 16. Mawh Chix Pon Hu Tawx To Kaux Cao Ex Ka Lai Chawk Son Grawng Nyiex Ma Ti Ka Daux Lum Carang Pwi Meung Lie?

Ang pon – Mawh ngie pwi koh carang kix pa deeh ap ti tawx ka lai carang heue. Can lai lox chawk an khawmuik mawh cao kix pa sang deeh ap ti tawx heue.

### 17. Mawh Sang Chix Tawx Akhwang Pa Laig Kix Pwi Koh Carang Khankix Daux Nyiex Lie?

Mawh kheu pwi koh carang khankix, kix caw ti sang tawx bawg yam yuh kaing daux nyiex maix, khiox khaw pwi khawmuik rieb teei ka kix heue. Khaix hoik teei kix carang, grum naog ang grum naog kix tak cied ti yaox sivoie ang kix nyang lih hu khaing nyiex maix heue. Phan maix ang sang tawx akhwang laig kix daux nyiex, cao mai caw ti pawk lox chawk kix plak praix nyiex maix heue. Phan chix tix, ex simie ti kieh pwi dha cox dee sang tiiem lai son cao tiiem carang heue.

### 18. Mawh Sang Pon Pawk Ex Ka Lai Chawk Ka Daux Enta Niet (Online) Lie?

Ang pon – Mawh kheu hoik fak ti deuh lox chawk in khankix ka daux gling baoh biang tix dah khaing, caw ngie ti pon yuh ngie ka daux lai chawk an khaing, mai sang koh ti teei ka carang lhang nyiex heue.

### 19. Mawh Sang Chix Teei Ka Lox Chawk An Lih Khaing (Wedsite) Mai To Kaux Cao Ex Sang Pon Tiiem Lie?

Ang pon – Ex keut son sang yie ti teei mai phat (Scan) ex tom sau ti deuh pak peung tix ceu, pa kok mawh (Barcode) ka daux nawh heue. Ka daux pa pon ex khaing (Wedsite) an kheu ang (Barcode) viex, ang pon ti teei lih carang pwi meung khaing (Wedsite) heue. Barcode an mawh pa sitoe ti deuh ka daux dahdee pa hoik tat ti deuh heue. Mawh daux krax blawng in pa chix joh jhan ti kieh ex pon ka ceu kaing pa sang pon tix tom khaw caw heue.

20. Yam Mawh Bawg Yam Carang Pwi Meung Phan Aux Caw Ti Ot Ka Daux Nyiex Priex Kwad (Phan ang mawh nan) Nyiex Nyo (Phan ang mawh nan) Daux Cub Caw Tix Mu Mu, Sang Chix Yuh Ka Mawh?

Yam in pa koh ti teei carang pwi meung in, ex sang shiao ka lox chawk (2) ceu heue. Mawh lox chawk son lhang nyiex ma, mai son cub caw khankix heue. Lox chawk son nyiex ma mawh son nyiex ma geu ngie, mai lox chawk son cub caw mawh son nyiex sidah khankix, nyiex thawng khankix, nyiex cawng vad khankix mawh son kix pa rom ti ot tau awm cub caw heue. Mawh kheu nan ex tom krai ah nin, ex jhak ka piang krax ot pwi mai koh ti teei carang heue.

21. Phan Caw Ti Hoek Daux Bang Dee Ot Pwi Laux Ot Kheu Naing Mawh Sang Sau Aux Laig Daux Carang Pwi Meung Lie?

Mawh heue – Sang sau laig heue. Ka daux bo sawm singaix teei carang pwi meung, can pwi pa ot ka daux meu haktiex meung man khawmuik tom hoek ka pa koe daux bang pwi tuk kha khankix ex tak koh ti teei ka carang kix uik heue. Can pwi kix, ex sang khrex tau mai pwi pa ot daux nyiex vai pwi tuk kha khankix heue.

22. Yam Hoek Daux Singaix Khix Loe (29) Ngaix Aux Tak Caw Ti Ot Daux Meung Tang Meung Heue. Phan Yuh Nan Sang Chix Plaik Aux Laig Daux Carang Pwi Meung Lie?

Mawh heue – Daux bo sawm singaix carang pwi meung an can pwi pa koe ceu kaux daux lhang nyiex mai nawh caw ti ot daux meung tang meung, tak sang teei ti sau ceu kaux nawh laig heue. Nawh hu ti ot daux tang meung daux pa laig daux been ang ah, ang laig been ang ah sang koh ti teei carang nawh heue.

23. Daux Khix Loe (29) Ngaix Pon Sawm, Phan Nyo Caw Ti Koe Daux Nyiex Ma Aux, Sang Sawm Ti Sau Laig Daux Carang Nyiex Ma Aux Lie?

Khix loe (29) ngaix bo an, pwi mawx ang ah phan it daux nyiex daux nyiex maix, pwi an khankix caw ti teei carang kix laig daux nyiex maix heue. Khix loe (29) ngaix pon bo an, phan ot dee hu krax, phan ot dee yuh kaing, phan ot daux bang pwie, yam hoek khix loe (30) ngaix mai phan nawh deeh hoek daux nyiex, tak sang teei ceu kaux nawh laig ka daux lhang nyiex an pa koe nawh heue.

24. Phan Pwi Pa Ang Mawh Daux Nyiex Ma Aux, Hoek Ti It Daux Nyiex Aux Daux Khix Loe (29) Ngaix, Mawh Hoik Sau Carang Nawh Laig Dee Ot Nawh Lie Ang Sau Lie? Chix Pon Ti Tawng Yuh Ka Mawx?

Haok khix loe (29) ngaix pon bo, koe nawh daux carang lhang nyiex pwi lie ang koe lie? Son sang kriem khaix hoik chawk cheng ka kix caw ti yuh carang kix ka mawx, hoik gau ti deuh ka pwi pa koh carang heue. Phan ang koe carang daux lhang nyiex nawh daux (29) ngaix pon bo, ang tau ti teei carang nawh heue.

25. Phan Aux Mawh Pwi Tang Meung Mawh Sang Sau Aux Daux Carang Pwi Meung Lie?

Mawh heue – Pwi meung ang ah, ang mawh pwi meung ang ah phan ot daux meu haktiex meung man, nyiex ma (Phan ang mawh nan) cub caw (Phan ang mawh nan)



pa ot daux bang vai pwi tuk kha ang ah, pwi an kix khawmuik, sang kieh kix laig daux carang pwi meung heue.

26. 2014 Num Carang Pwi Meung Pa Teei In, Sang Kieh Pwi Meung Tawng Yam Mawx? Phan mawh krax koh carang pwi meung an, 2015 num baux jah (4) khix tak plih lih mai phan mawh krax koh pa dha tawng caw ti mawh 2014 num khix sidaix heue.

27. Son Sang Pon Plih Lih Krax koh Carang Pwi Meung An, Dak Kieh Bawg Yam Rheung Ding Dot Yuh Ka Mawx?

Pa bak ex mawh lhang nyiex (11) lan, ka daux an jung pwi kaux mawx kaux an caw ti khrex ka carang kix heue. Son sang khrex rien son pwi ding dot, sang uik bawg yam tom nie heue. Khaix an kheu kawn cied cheu ti yaox mai yuh son sang yie doh rhawm pwi haktiex ka grawng an, mai sang shiao bawg yam tom khaw caw, bawg yam sang rheung kheu an heue.

28. Pwi Pa Ang Laig Daux Been Khankix, Sang Teei Carang Kix Nang Lie?

Mawh heue – Daux khix loe (29) ngaix an, can pa koe daux meung man khawmuik, laig daux been ang ah ang laig daux been ang, tak sang teei carang kix heue.

29. Phan Ang Khaw Rhawm Ka Pwi Teei Carang Pa Caw Beeh Glawm Ti, Chix Ti Hu Ka Pwi Teei Carang Tang Kaux Tix Kaux Kaux Lie?

Phan ang khaw rhawm ka pwi teei carang pa caw beeh glawm tan, chix ti hu ka cao cied carang krai nawh mhong pa lo tix mai mhaing krax teem ka nawh heue.

30. Koe Pwi Yuh Kaing Pa Ot Ka Daux Nyiex Heue. Mawh Sang Kieh Nawh Viex Daux Carang Lhang Nyiex Aux Lie?

Ankix, koe ka piang krax ot krax koe heue. Phan nawh ot mai maix mai ih mai maix, chix ti kieh nawh mawh pwi ka daux nyiex maix heue. Phan nawh ot tang dah mai tang yuh cao ti ih priex, kheu nawh tang mawh lhang nyiex tix mu, caw ti tang teei carang kix nong nong heue.

31. Yuh Ka MAwx Chawk Ti Tawng Grawng Simex Mai Bon Ngie Mai Ang Chawk Ka Grawng (Gender) Pa Mawh Grawng (Simex Bon)?

Simex mai sibon mawh kheu hoik tang gwoih ka pak peung tom chix kok mawh simex mai sibon heue. (Gender) pa ah nan, mawh ngie pa gwoih been grawng ngie khaing heue.

32. Chix Chawk Ka Grawng Ceu Pwi Yuh Ka Mawx?

Phan sang sawg ti tawng grawng ceu cad ceu pwi tix ceu, caw ti mhaing grawng ceu pwi heue. Ka daux meung man mawh ceu pwi pa tix pa ot lie? Mawh tang krax ot kix yuh ka mawx lie, ceu pa kieh can pa lo ceu pwi khankix sidaing mawh pa ting ceu

heue. Pa chawk ka grawng ceu pwi bawg yam teei carang pwi meung in, mawh ngieh son kaing teei carang ngie khaing heue. Phan mawh ceu pa shiang mai ceu pwi ceu pwi mawx ang ah, koe akhwang ti kraik ceu kaux pwi cao tix heue. Ceu pwi pa ting (8) ceu mai ceu pwi pa iak (135) ceu an mawh pa hoik sau ceu kaux ka daux pa koe grawng kaing heue. Phan ang nyang viex ka daux (135) ceu an, "Tang Dah" tiem yuh nan mai khaix hoik laug pwi pa pawk an ti ceu kieh nawh kraik ceu tix tak tiem ka daux mhai yi heue.

### 33. Yuh Ka Mawx Chix Chawk Ti Tawng Ka Lox Chawk Pa Shiang Mai Kraung Can Pa Koe Daux Nyiex Yix Khankix Lie?

Mawh kheu sang tawng ex ka krax ot krax koe plak lah lai mai son sang chix jhi yaox ka krax ot kawn pwi pa khaw ti hawt jawh kah, ex tom chawk chang ti tawng heue.

### 34. Chawk Ti Tawng Lox Chawk Pa Shiang Mai Pwi Pa Ang Grum Naog Pakpeung Jao Pa Tix Lie?

Son sang tawng ka pwi pa ang grum naog pakpeung krax ot kix koe yuh ka mawx, son sang ti gwoih glawk ot pwi pa ang grum naog pakpeung khankix, kied mawh pa ting ceu heue. Tak sang chix teem gaw ka kix son krax nyawm ot kix mai son pa lo kix ceu pa iak pa liied khankix heue.

### 35. Sang Chix Koh Teei Carang Pwi Pa Ot Daux Thawng, Daux Nyiex Sidah, Daux Nyiex Nyo, Mai Nyiex Cub Caw Khankix Yuh Ka Mawx?

Can pa mawh cub caw pa mawh nyiex thawng, nyiex sidah, nyiex nyo, tak sang teei pwi ka daux cub an khankix mai tawx beeh glawm ka kix, mai kieh kix teei carang heue. Tak sang khoix khaw ka cao giex kaing khankix, kieh kix teem ka pwi teei carang, son ceu pa lo daux kix heue. Phan mawh ka daux nyiex nyo, ex sang shiao lai mhat pong teng cie kix, mai ex sang koh ti teei carang pwi meung ka pwi pa paung ka daux nyiex nyo heue. Ex sang shiao ka lox chawk pa yuh ti deuh son cub caw khankix mai sang teei carang ka piang an heue.

### 36. Sang Chawk Ka Lox Chawk Pa Tix?

Can lox chawk pa shiang mai carang pwi meung an mawh lox chawk simex/sibon, ju, grawng nyiex ma, beenli pa krub, ceu pwi, dee ot jheeng jheeng, grawng pa shiang mai pa duh dee ot tix khankix, pa mawh lox chawk pa shiang mai krax nyawm ot, krax pingnya, pa yuh kaing jhaw, pa keh kawn, pa yum, pa yuh kaing ceu pa koe bwan son son pwi, mai can lox chawk tang ceu khankix heue.

### 37. Phan Aux Caw Ti Hu Krax Daux Bo Singax Carang Pwi Meung An, (Phan Ang Mawh Nan) Phan Aux Caw Ti Hoek Plak Praix Kheu Kaing Krax Ot Pwi Tix Ceu Ceu, Sang Yuh Ka Mawx?

Daux khix loe (30) ngaix phan dee ot tix, phan maix ang it daux nyiex pwi tix kaux kaux, tak sang koh ti teei carang maix ka daux nyiex dee ot maix jheeng jheeng heue. Viang mawh nan phan maix yaog khaing mandalay hu ka daux Yan Kong haok khix loe (29) ngaix plak, mai ang lai it daux krax, mai phlang phlat ti hoek daux Yan Kong haok khix loe (30) ngaix, ka daux bo an singaix koh ti teei carang pwi meung,

awm pa kawn ot maix daux mandalay mai caw ti sau carang cie maix ka dee ot maix daux mandalay tan heue. Phan krai lox rah, yam koh ti teei carang pwi meung yam pwi tix kaux kaux lih krax, caw ti teei carang nawh dee jah nawh ti lih krax tan heue.

38. Ex hoik tawng grawng pa jah ti koh teei carang pwi meung ka daux khix loe (30) ngaix heue. Viang mawh pwi tix hoek ti ah aux sang teei carang pwi meung heue. Pwi an chix mawh pwi pa koe beeh glawm daux pa laig daux been lie?

Sivoe ang bax nyang koh ti teei carang pwi meung, kawn dha ti yuh grawng sang koh ti teei carang ka daux lum sivoe heue. Carang an mawh carang son dah dee,dee ot pwi hun khankix heue. Mawh carang pa tat tix deuh dah dee,dee koh pwi carang khankix mai tawx beeh glawm ka kix heue. Son ang pwi tix kaux kaux lai koe pa deuk, mawh carang pa koe bwan son son kaing ceu an khankix heue. son sang koh ti teei carang, caw ti khrex ti deuh carang an khankix heue.

39. Daux khix loe (29) ngaix nhaox, aux hoik ot daux nyiex tix heue. Viang mawh nan aux sang lih krax daux khix loe (30) ngaix pon ngawb mai aux sang deeh hoek khix singaix hoek pwi ti teei carang pwi meung daux khix pon (10) singaix mai sang deeh hoek daux nyiex tix khaix singaix an heue. Son sang viex aux ka daux carang pwi meung aux sang caw ti yuh ka mawx?

Kwad yaong (phan ang mawh nan) pwi ting beeh glawm daux carang pwi meung yuh tawng dee ot kix mai sito tau mai kix heue. Sivoe ang nyang lih khaing nyiex maix ploi pwi teei carang tix kaux hu ka nyiex maix mai nawh tak sang cox khre krax pa teei carang son pex heue.

40. Carang pwi meung mai pa yuh krax laug teei daux 2015 num sax shiang ka paox ti yuh ka mawx?

Carang pwi meung mai pa sang yuh krax pa laug daux 2015 num sax, ang doh chix shiang mai paox tix, tix bawg kawx, tak sang pon ti tawng jung pwi meung man mie ding, simex/sibon mie kaux, mai pwi mawx koe ju mie ding heue. Viang mawh nan, awm pa koe been hawt jawh, caw ti mox ti deuh kah heue. Pa sang ah nan pwi tix kaux, mawh pwi mawx mawh pa sang yuh ka mawx ang tau ti chix tawng kah, maw kheu nan, ang tau ti chix kieh kix mawh cao pa pon laik daux pawie laug silah heue. Mawh ngie "Kaw mi shin" pa laug ti teei, cub caw pa ang mawh cub pwi ting pa kaoh khaing Tiekkato ngie khaing pa pon ti shiao ka carang khankix heue. Phan haktiex dee kwang tix mu an. Pwi pa koe ju ka piang (18) num khawmuik koe mie ding mai phan ang khaw mai jung pwi pa hoik tang ti deuh son silah khankix, chix ti sawg tawng grawng an heue. Mawh daux krax daux blawng in ti ceu pa chix kieh sawg tawng ka pwi mawx pa tang tip pon silah mai pa ang nyang tang tip pon chix kieh tawng kah heue.

41. Carang pwi meung mai carang jung pwi shiang mai paox tix yuh ka mawx?

Carang pwi meung mai carang jung pwi ang doh shiang paox tix, phan mawh carang pwi meung mawh son sang pon tawng ka jung pwi mai pa lo jung pwi ka daux meung man mai mawh pa koh ti teei carang an khankix heue. Yam hoek pwi teei carang ka

daux nyiex maix, ang mhaing ti jhak ka lai lhang nyiex maix, mawh ngie chawk nawh ka maix grawng koe pwi ka daux nyiex mai yam in mie kaux daux 2014 num khix loe (29) ngaix pon bo heue. Phan yuh nan nawh tom chix tawng ka daux bawg yam pa hoik tat ti deuh an, koe jung pwi haktiex mie ding heue. Carang pwi meung pa ah nan mawh pa teei carang pwi meung ka daux tix ghiiep ngai khaing awm pa thawng riang ka meung man heue.

#### 42. Haktiex pa suksag khankix sang chix pon teei carang pwi meung ka kix yuh ka mawx?

Haktiex pa suksag khankix sang chix pon teei carang pwi meung ka kix yuh ka mawx? 2014 num khix pon, yam jah ti teei carang pwi meung, tak sang laux ka krax puing pwoih pao tix, hoik mawh lox pa yum rhawm grawng pa keut pot khaing cao giex kaing khankix heue. Tom yam in cao giex kaing ting daux lum krax ot pwi mai riang rao pwi haktiex, hoik khrawm ti yaox ka cub pa koe beeh glawm khankix, son sang pon teei carang pwi meung heue. Can cao giex kaing ka daux haktiex dee suksag an khankix, mawh kheu hoik sang rieb ti rom koh teei carang pwi meung tau, mawh kheu hoik rieb kix ka kaing in mawh pa koe bwan son son krax haok huan mai pa keung pa caw ti yuh heue.. Son sang pon khrawm ti teei carang pwi meung ka pwi pa koe ka daux meung khawmuik mai ka daux haktiex dee ot pwi khawmuik, can pwi pa giex kaing plak carang pwi meung mai plak haktiex dee kwang dee mawx dee an, tak sang khrawm pao tix mai rom ti yuh kaing tau heue.

- Tak sang rawg akhwang ka cao giex kaing khankix pa koe daux cub caw ceu pwi mawx ceu pwi an, mai kieh kix mawh cao pa teem teei carang son ex heue.
- Hoik khrex rien ti deuh son sang pon khraix khrawm ka pwi haktiex baoux mawx baoux an, son sang kieh pwi haktiex khawmuik tawng ka grawng teei carang pwi meung tom vieh va heue. Can kaing ceu an khankix mawh kaing pa sang khrawm ti rom yuh tau mai mawh pa kieh tawng grawng pa teei carang pwi meung in mawh pa shiang mai pwi khawmuik, maw kheu nan nyawk pie pex pie pon, ex tak sang yuh lih plak lox pwi pa koe ka daux meung man khankix, mai hoik khrex rien ti deuh yam in heue. Can pwi meung khawmuik caw ti tawng grawng pa caw pa khaw kukaux ti sau carang tix, awm an, caw ti tawng grawng pa koe beeh glawm ti kieh pa sau carang tix an mawh pa khaw caw mai pa laig aux been pa deuh son kaing an heue.
- Ka daux carang pwi meung kawmiti glawk baux veng khankix can cub caw pa koe ka daux cub caw pwi haktiex khawmuik caw ti viex tau heue.





## 2014 Num Jung Pwi Mai Grawng Nyiex Lox Pa Sang Chawk (41) Ceu Sang Chawk Ka Pwi Uik

1. Ceu Kaux
2. Shiang mai cao giex kaing nyiex yuh ka mawx?
3. Simex/bon
4. Ju pa hoik naog
5. Grawng nyiex ma
6. Beenli pa krub
7. Ceu pwi
8. Pa ang grum krax nyawm ot (ngai yaox, yhaok mhong, pa suh shiah koe pa nu mie ding, iak riang dong gua)
9. Lek mat ceu pa giex ti deuh
10. Dee keh
11. Dee ot jheeng (Veng / Yaong)
12. Dee ot an ot mie hreeng
13. Thawk ot tix kheu grawng pa tix
14. Sivoie ang nyang thawk ot dee in ka sivoie an dee ot (Veng / Yaong)
15. Chix lai pa tix (Lai plak lox tix ang ah)
16. Pa gau lai yam in glawk mie ding
17. Hoik gau lai sidah glawk mie ding
18. Kaing yuh dix bawg yam pa hoik luan (12) khix mawh kaing pa tix
19. Kaing yuh pa ting ceu
20. Ceu kaux cub caw mai beeh glawm dee yuh kaing

### Lox Chawk Ka Sibon Pa Hoik Sax Koe nyiex ma ku kaux

21. Hoik sax keh kawn mie kaux
22. Kawn pa kawn koe yam in koe mie kaux
23. Kawn pa yum koe mie kaux
24. Grawh grawng kawn nyawm pa hoik keh ti koe

## Lox Chawk Pa Shiang Mai Grawng Nyiex

25. Nyiex ot mawh nyiex pa tix
26. Krax pa cie maix ka nyiex an
27. Ngu pa riang pa shiao daux nyiex mawh ngu pa tix
28. Rawm nyaux rawm shiao pon yuh ka mawx
29. Plok ti ih priex ka ngu pa tix
30. Nyiex rawm koe yuh ka mawx?
31. Kraung pa shiao kraung nyiex ot maix plak nie mawh patix.
32. Kraung shiao pa koe daux nyiex (cag bhaung, cag rieang im, cag maox rhieam, deuh piang pheem, cag maox rhieam giex taix, cag dong, cag Engtaniet, cag thai, maw taw bok, lawx, (mawie, krak, brung)

## Pwi Daux Nyiex Ma Pa Hoek daux Meung Tang Meung

33. Ceu Kaux
34. Ju pa hoik naog
35. Simex/bon
36. Num lih hu nawh
37. Meung dee hu ot nawh

## Grawng Pwi Daux Nyiex Pa Hoik Yum Daux Bawg Yam Pa Hoik Luan Ka Daux (12) Khix

38. Ceu Kaux
39. Simex/bon
40. Yam yum koe ju mie ding
41. Phan pwi yum an mawh sibon mai phan mawh bon koe ju ka daux (15-49) num yum kheu koe kaux/yum keh kawn/ yum khaix hoik keh kawn ka daux (6) khix lie? Mawh ang mawh chawk ti yaox.





Phan Sang Tawng Hoek Tom

[www.dop.gov.mm](http://www.dop.gov.mm)

<http://myanmar.unfpa.org/census>

